

## Evening Dogri News

20<sup>th</sup> April 2024

1815 hrs

### Headlines

- 1 जम्मू संसदी हल्के च चुनाव मैदान च खड़ोते दे 22 मेदवारें दी किस्मत दा फैसला 17 लक्ख 67 जहार शा मते मतदाता 26 अप्रैल गी करगंन।
- 2 जम्मू कश्मीर दे मुख्य चुनाव अधिकारी पी.के.पोले होरें जम्मू च सुचेतगढ़ अंतर्राष्ट्री बन्ने दा दौरा लाइयै सरहदी बसनीकें गी बिजन डर-त्राह दे वोट पाने दी अपील कीती।
- 3 भारती जनता पार्टी अनंतनाग राजौरी संसदी सीट दे चुनावी मकाबले थमां बाहर निकली गई ऐं इस सीट लेई इलाकाई पार्टिं बश्कार हुन मुख्य मकाबला होग।
- 4 भारत दे प्रधान न्यायधीश डॉ. डी.वाई.चन्द्रचूड होरें आकखेआ ऐ जे नमें अपराधिक कनूनें दा लागू होना साफ तौरा पर दर्शादा ऐ जे मुख्य अगगे बधै करदा ऐ।
- 5 जम्मू श्रीनगर राष्ट्री जरनैली शिड़क पर गडिडएं दी आओजाई अद्धे-दुब्बे तौरा पर ब्हाल होई गई ऐ।

<><><><><><>

### Jammu Seat

पैहले गेड़ दे आम लोकसभा चुनाव दे पूरा होने मगरा लोकसभा चुनाव दे दुए गेड़ लेई प्रचार होर तेज होई गेआ ऐ। जिंदे 25 अप्रैल गी 88 संसदीय सीटें लेई मतदान होंगन। जम्मू कश्मीर च 26 अप्रैल गी होने आले आम चुनाव दे दुए गेड़ च जम्मू-सांबा-रियासी लोकसभा सीट लेई 17 लक्ख 67 जहार मतदाता 22 मेदवारें दी किस्मत दा फैसला करगंन। हालांके मुख्य मकाबला बीजेपी ते कांग्रेस बश्कार ऐ पर इस इलाके च 22 मेदवारें दी किस्मत दा फैसला 17 लक्ख 67 जहार 837 मतदाता करगंन जेहदे च सांबा, जम्मू ते रियासी जिले शामिल न। इस सीट लेई बीजेपी दे केई वरिष्ठ नेताएं प्रचार कीता ऐ जिंदे च गृहमंत्री अमित शाह, रक्षामंत्री राजनाथ सिंह होर शामिल न। दूई बक्खी कांग्रेस लेई वरिष्ठ नेता सचिन पायलट, राज बब्बर ते नैशनल कांफ्रेंस दे वरिष्ठ नेताएं कांग्रेस दे मेदवार रमण भल्ला हुंदे आस्तै प्रचार कीता जेहड़े कांग्रेस दे कार्यकर्ता बी ऐन ते 2 बारी विधायक रेही चुके दे न।

<><><><><><>

### CEO-JK SVEEP

जम्मू रियासी संसदी सीट लेई दुए गेड़ तैहत होने आले चुनाव शा पैहले जम्मू कश्मीर दे मुख्य चुनाव अधिकारी पी.के.पोले होरें बन्ने कश रौहने आले बसनीकें गी अपील कीती ऐ जे ओह 26 अप्रैल गी चुनाव आले घ्याड़े बधी-चढ़ियै मतदान करन। सुचेतगढ़ आकट्रॉय पोस्ट पर आयोजित इक विशेष सांस्कृतिक कार्यक्रम दरान बोलदे होई पी.के.पोले होरें आकखेआ

<><><><><><>

### Anatnaag Seat

बीजेपी नै अनंतनाग राजौरी संसदी सीट लेई कुसै मेदवार गी टिकट नेई दित्ती ऐ। इस सीट लेई नामजदगी दाखल करने दा कल खीरी घ्याड़ा हा पर बीजेपी थमां कुसै नै बी नामांकन नेई भरेआ। इस सीट लेई कुल 25 मेदवारें नामांकन दाखल कीते न ते इस सीट लेई चुनाव 7 मइ गी होग। पैहले इस गल्लै दा अंदाजा लाया जा

करदा हा जे पहाडी लोकें गी पट्टीदर्ज जनजाति दा दर्जा थ्होने दे बाद बीजेपी इस नमीं कायम कीती गेदी सीट लेई अपने मेदवार गी पक्क गै चुनां मैदान च तोआरग की जे राजौरी जिले च पहाडी लोकें दी खरी मती अबादी ऐ। इस सीट लेई चुनां मैदान च खडोते दे मुख मेदवारें च जम्मू कश्मीर दियां साबका मुखमंत्रि ते पीडीपी दियां प्रधान महबूबा मुफ्ती, नैशनल कांफ्रेंस दे वरिष्ठ नेता मियां अल्ताफ, अपनी पार्टी दे नेता जफ्फर इकबाल मन्हास ते डेमोक्रेटिक प्रोग्रेसिव आजाद पार्टी दे सलीम परें शामिल न। एह्दे शा पैहले डीपीएपी दे प्रधान ते साबका मुखमंत्रि गुलाम नबी आजाद होरें इस सीट थमां चुनां लडने दा मन बनाए दा हा पर मगरा उनें अपना एह बचार बदली दित्ता।

<><><><><><>

## Reasi DEO

रियासी जिले च जेहड़ा संसदीय खेत्तर दा गै हिस्सा ऐ च रियासी जिला चुनां दफ्तर नै 26 अप्रैल गी होने आले चुनां गी बवस्थित ढंगै कन्नै कराने लेई पूरियां तैआरियां करी लैती दियां न। रियासी दे जिला चुनां अधिकारी विशेष महाजन होरें आकाशवाणी दे संवाददाता कन्नै गल्ल करदे होई दस्सेआ ऐ जे प्रशासन मतदाताएं दी भागीदारी च बाद्धा करने ते निर्बिघ्न तरीके कन्नै मतदान प्रक्रिया लेई असरदार ढंगै कन्नै तालमेल बनाइयै कम्म करने उप्पर मता जोर देआरदा ऐ। उनें इब्बी आक्खेआ ऐ जे अगले दक्क दिनें दरान यानि के ऐतवार ते सोमवारें टीम 85 बरें दे बद्ध उमरी आले लोकें ते दिव्यांग लोकें दे घर जाइयै उंदे मतदान करोआंगन।

<><><><><><>

## SVEEP Jammu

महिला कालेज परेड जम्मू च अज्ज स्वीप रैली दा आयोजन कीता गेदा हा जेहदे च जम्मू दे डिप्टी कमीशनर सचिन कुमार वैश्य होरें उंदे मजूद सब्बनें गी लोकतंत्र ते मतदान दे महत्वै गी पंछानने बारे प्रेरित कीता।

<><><><><><>

## Kishtwar 67

2019 दे आम लोकसभा चुनां दे मकाबले च कल हाल च गै होए दे चुनां च किश्तवाड़ जिले च मतदाताएं दे मतदान च 7 फीसद दा बाद्धा कीता गेआ ऐ। किश्तवाड़ दे साढे संवाददाता दी जानकारी मूजब कल होए दे चुनां च 67 फीसद मतदाताएं वोट पाने लेई अपने हक्कै दा इस्तेमाल कीता ऐ। ध्यानजोग ऐ जे स्वीप तैहत आयोजित बक्ख-बक्ख गतिविधिं ते खास तौरा पर महिलाएं लेई खडरे गेदे पिंग पोलिंग स्टेशनें जिनें गी पैहलकदमिं करी इस किस्में दे उत्साह बधाने आले नतीजे हासल होए न।

<><><><><><>

## CJJ-Confrance

भारत दे मुख न्यायधीश डॉ. डी.वाई.चन्द्रचूड़ होरें आक्खेआ ऐ जे नमें अपराधिक कनूनें दा होना साफ तौर पर दर्शादा ऐ जे मुख बदलै करदा ऐ, अगड़ा बधै करदा ऐ। अज्ज नमीं दिल्ली च इक सम्मेलन गी संबोधत करदे होई डॉ. चन्द्रचूड़ होरें आक्खेआ जे भारती न्याय संहिता, भारती नागरिक सुरक्षा संहिता ते भारती साक्षय अधिनियम इनें चौनें अपराधिक कनूनें दा लागू होना दर्शादा ऐ जे मुख अपनी अपराधिक न्याय प्रणाली च महत्वपूर्ण बदलाव करने लेई तैआर ऐ। उनें आक्खेआ जे इनें कनूनें अपराधिक न्याय दी दिशा च भारत दे कनूनी ढांचे गी इक नमें जुग च बदली दित्ता ऐ। आर्टिफिशियल इंटेलीजेस दे इस्तेमाल पर जोर दिंदे होई डॉ. चन्द्रचूड़ होरें आक्खेआ जे अपराधिक जांच दे मामलें च न्याय पालिका गी आर्टिफिशियल इंटेलीजेस दी मदाद कन्ने जांच दी प्रगति च मदाद थ्होग। उनें आक्खेआ जे प्रक्रियां च गड़बड़िं दा पता लाने लेई आर्टिफिशियल इंटेलीजेस दा इस्तेमाल कीता जाई सकदा ऐ। उनें इब्बी आक्खेआ जे एह सब्बै नमें कनून तदुं गै कामयाब होंगन जदुं देसै दा हर इक नागरिक इनें गी अपनाग। विधि ते न्याय विभाग दे राज्यमंत्री अर्जुन राम मेघवाल होरें आक्खेआ जे 21मीं सदी च नमें अपराधिक कनूनें दा लागू होना इक ऐतिहासक गैह ऐ। उनें इब्बी आक्खेआ जे इनें कनूनें च ऑनलाइन जांच ते ई-फाईलिंग जेनह विशेष प्रावधान बी शामिल न।

## Hideout Reasi

सुरक्षाबलें अज्ज रियासी जिले च रलाए गेदे इक तपाशी अभियान दरान बरनेली इलाके च आतंकवादिएं दे छप्पने आले इक गुप्त ठकाने गी नास करी दित्ता। सुरक्षाबलें उत्थुआं थेआर ते गोला बरूद बी बरामद कीता ऐ। खबर अजेंसी पीटीआई नै रियासी दिएं एसएसपी माहिता शर्मा हुंदे हवालै नै दस्सेआ ऐ जे उत्तिआं 2 डेटोनेटर, एके असाळ्ट रफल दे 12 राउंद, आईईडी सक्षम इक टेप रिकार्डर ते किश होर समेयान बी शामिल ऐ।

<><><><><><>

## JKACS

जम्मू कश्मीर दी एड्स दी रोकथाम सरबंधी सोसायटी नै केन्द्र शासत प्रदेश च एचआईवी संक्रमन दे अजें तोड़ी सामने नेइं आए दे मामले दा पता लाने ते जोखिम दी श्रेणी आले लोकें तोड़ी पुज्जने लेई सूचकांक अभियान रखेआ ऐ। इस अभियान दी मदाद कन्नै राष्ट्रीय सतह पर ओकड़ा लक्ष्य हासल करने च मदाद थ्होग जेह्दे राएं एचआईवी कन्नै जीन जिया'रदे 95 फीसद लोकें गी उंदी स्थिति बारे जानकार बनाया जाना ते जम्मू कश्मीर दी एड्स नियंत्रण सोसायटी दे प्रोजेक्ट डायरेक्टर हुंदे मूजब इस पैहलकदमी कन्नै एचआईवी एड्स दे संक्रमण गी अगगे बधने थमां रोकने च मदाद थ्होग।

<><><><><><>

## Medical Camp

मुख्य सचिव अटल डुल्लू होरें अज्ज जगटी ग्रां दे उप-जिला अस्पताल च दरुं रोजा मल्टी स्पेशियल्टी मैडिकल कैंप दा आयोजन करोआया। इस कैंप दरान दमागी बमारिएं दे माहिर डॉ. सुशील राजदान ते होरने माहिरें डाक्टरें आस्सेआ रलियै लोकें दी मुफ्त जांच कीती जाग। मुख्य सचिव होरें विश्व कश्मीरी समाज दी इस पैहलकदमी आस्तै सराहना कीती ते आक्खेआ जे इयै नेह् मैडिकल कैंप आम लोकें गी बेह्तरिन मैडिकल पेशेवरें थमां सलाह लैने दा मौका उपलब्ध करोआंदे न।

<><><><><><>

## Women Wrestlers

भारती महिला पलोआन विनेश फोगाट, अन्शु मलिक, रीतिका ते मानसी किरगिस्तान दी बिशकेक थाहर आयोजित एशियाई ओलंपिक क्वालीफायर दे सैमीफाइनल च थाहर बनाई लैती ऐ। विनेश नै कम्बोडिया दी प्रतिद्वंद्वी समानांग डीट गी हराया जदके 2021 दी विश्व चैंपियनशिप च चांदी दा तगमा जित्तने आली अंशु मलिक नै किरगिस्तान दी कलमिरा बिलिम्ब ऐकोवा गी तकनीकी श्रेष्ठता दी बिनाह पर हराई दित्ता। 23एं ब'रे शा घट्ट उमरी दी विश्व चैंपियन रीतिका नै ची नदी अपनी प्रतिद्वंद्वी जुवानवांग गी शिकस्त दित्ती। उत्थें दूई बक्खी मानसी नै किरगिस्तान दी इरिना कुजनेतसोवा गी हराया ऐ।

<><><><><><>

## NH-44

जम्मू श्रीनगर राष्ट्रीय जरनैली शिड़का पर गडिडएं दी आओजाई गी परतियै ब्हाल करी दित्ता गेआ ऐ ते नाशरी ते बनिहाल बश्कार फसी दी गडिडएं गी बी कड्डेआ जा'रदा ऐ जेड़ियां रामबन जिले च कल भारी बरखा दे मगरा ल्हास-पस्सियां ते जन्नी बट्टे पौने करी फसी दियां हियां। रामबन दे संवाददाता नै ट्रैफिक पुलस दे अधिकारी दा हवाला दिंदे होई यात्रिएं गी ट्रैफिक पुलस दी हैल्पलाइन थमां जानकारी हासल करने मगरा अपनी लेन च अनुशासन कन्नै चलने ते अगगे दा सफर करने दी सलाह दित्ती ऐ।

<><><><><><>